



Dezafiu sira atu prevene no kombate Korupsaun no promove Governasaun Diak no Importánsia hosi Lei Anti-Korupsaun

Hanoin ki'ik-oan ruma ba komemorasaun Loron International Kontra-Korupsaun, iha 9 Dezembru¹ kada tinan

Ita hatene katak kazu korupsaun ne'e kazu ida-ne'ebé kompleksu tanba envolve sistema no envolve ema/individu sira ho kapasidade oioin. Ne'e inklui kapasidade tanba iha poder politiku, ka tanba sira nia intelejénsia (matenek) no tanba kapasidade seluk atu influénsia prosesu sira ne'ebé lao hela.

Rekoñese natureza kompleksidade hosi kazu korupsaun ne'e, nune'e ezije aprosimasaun no estratéjia investigasaun espesifiku, tanba krime ne'e la hanesan ho krime ordinariu sira seluk. Nune'e mós esforsu atu hasoru krime sira ho natureza kompleksidade hanesan ne'e, tenke mós hatan ho maneria no estratejia ne'ebé komprensivu maibe espesifiku tuir nia natureza.

Enkudramentu legál

Iha nivel konseitu, ita iha Konstituisaun², ita ratifika ona Konvensaun Nasoins Unidus kona-ba Konvensaun Kontra Korupsaun (United Nations Convention against Corruption); no Lei Estatutu Komisaun Anti Korupsaun. Maibe ita seidak iha Lei Anti-Korupsaun atu defini espesifikamente ba krime sira korupsaun nian no mekanismu propriu seluk atu kombate korupsaun liuhosi aktu preventivu nomós represivu.

Tanba ne'e, too agora prosesu ba kazu korupsaun sira refere deit artigu ka provizaun sira iha Kódigu Penal aplikavel ne'ebé hatur iha Titlu VI kona-ba 'krime sira iha funsaun publiku nia ezersísio'.

Provizaun hirak ne'e hahú hosi artigu 292 too artigu 299 ho kombinasan/konjugasaun ho artigu sira kona-ba agravasaun no konseitu funsionáriu públiku (artigu 301 no 302).

Tuir JSMP nia monitorizasaun, kazu sira barak ne'ebé tama ba tribunál mak krime sira ho kategoria :

1. Partisipasaun ekonomiku iha negosiu

1 Materia ida-ne'e apresenta iha 22 Feveireiru 2016 atu komemora Aniversariu KAK ba dala VI Salaun Reuniaun CNE – Dili, maibe atualiza fali hodi ajusta ho situasaun atuál.

2 Artigu 1 Konstituisaun Timor-Leste ne'ebé ko'alia kona-ba prinsipiu Estadu-de Direitu, no Artigu 6 letra (e) Konstituisaun ne'ebé definêe katak hari sidadaun sira nia bem-estár materiál no espirituál hodi loke-dalan atu harí sosiedade ida ne'ebé hatur iha justisa sosiál;

2. Administrasaun danoza
3. Abuzu poder
4. Pekulatu
5. Abuzu konfiansa, no
6. Korrupsaun pasiva ba aktu lísitu & Korrupsaun ativa.³

Krime hirak ne'e nia autor bele envolve individu ka bele grupu.

Total kazu tuir JSMP nia monitorizasaun (durante tinan tolu-ikus)

Iha tinan 2014-2017, JSMP monitoriza kazu korrupsaun 59. Enkuantu, tuir relatóriu balansu hosi Prokurador Jerál Republika entre tinan-2013 to'o 2016⁴, Ministériu Públiku prosesu ona hamutuk 286, no entre hirak ne'e 165 promove ona akuzasaun ba Tribunál sira.

Kazu sira ne'e envolve autoridade nivel aas hanesan eis ministru ho eis ministra no, eis vise-ministra, eis-sekretariu estadu, diretores no funsionariu sira balun.

Kazu hirak ne'e hatudu progresu iha area justisa. Mesmu iha dezafiu no limitasaun oioin, inklui presaan ka dalaruma intervensaun, maibe tribunál sira mantein sira nia responsabilidade institusionál atu asegura justisa ba ema hotu. JSMP fiar katak iha estadu sira ho esperensia postu konfliktu hanesan Timor, la'os fasil atu lori nia ministru/a ka eis ministru no ministra sira ba hatan iha tribunál. Kontráriu iha Timor, ita bele halo ida-ne'e.

Dezafiu sira relasionadu ho komitmentu ba kombate korrupsaun

1. La iha lei própriu kona-ba Anti-Korrupsaun

Mesmu iha inisiativa oioin mai-hosi instituisaun relevante sira hanesan Ministériu Públiku no KAK rasik atu apresenta Esbosu Lei KAK ba Parleментu Nasional, maibe too agora, Parleментu Nasional la fó resposta pozitivu ba inisiativa hirak ne'e.

Hanesan diskuti ona iha leten katak krime korupsaun mai ho nia natureza, no kompleksidade rasik inklui nia "modus operandi" ne'ebé dinamiku hosi tempu ba tempu. Tanba ne'e, importante atu iha lei proproriu ba KAK hodi fó kbit no kapasidade adekuaudu ba KAK atu halao nia servisu ho efetivu tuir krime nia natureza no kompleksidade.

2. Kestaun kona-ba Rekursu umunus iha area tribunál

Tanba limitasaun rekursu umanus iha setor justisa (to'o ohin lora ita la iha juis no prokurador espesializadu ba kazu korupsaun); mesmu iha iha tinan sira liu ba kotuk,

³ Relatoriu Anuál JSMP: 'Observasaun Jerál Setor Justisa, tinan 2015 & 2016, disponivel iha website JSMP: www.jsmp.tl

⁴ Prokuradoria Jerál Republika, Relatóriu Balansu Realizasaun sira 2013-2017

Ministeriu Publiku hahú koloka ona majistradu sira balun iha area ida-ne'e. Mesmu nune'e, seidak iha esforsu no mekanismu atu hametin sira nia abilidade tekniku espesifiku iha area ne'e inklui dezenvolve estratejia propriu oinsa mak bele hasoru krime sira hanesan korupsaun);

Ami hanoin katak atu asegura prosesu ne'ebé diak no efetivu hodi kombate korupsaun tenke iha prokurador no juiz iha area espesifiku iha ba kombate korupsaun aleinde iniciativa sira seluk.

3. Kestaun kona-ba implementasaun Lei Protesaun Testemuña

Mesmuke lei ne'e tama iha vigor desde 2009 –maisumenus iha tinan 9- liuba), maibe to'o agora seidak implementa ho diak.

Protesaun ba testemuña (sasin) ne'e nesesáriu atu garante direitu no liberdade sasin nian no nune'e bele kuidadu prova hotu-hotu ne'ebé iha relasaun direta ho krime ne'e to'o prosesu ikus ba desizaun.

Protesaun ba testemuña iha elementu esensial rua:

- 1) Ema ne'ebé kualidade nu'udar vítima presiza hetan protesaus no tratamentu husi instituisaun relevante tuir responsabilidade no nesesidade espesífiku iha kazu ida-idak. Protesaus ne'e atu asegura vítima iha kualkér forma hetan protesaus no seguransa hodi salva no prezerva prova ne'ebé relevante no asosiadu iha krime ne'e;□
- 2) Protesaus ba testemuña mós importante tebes atu ajuda deskobre faktus sira ne'ebé partense ba kazu ne'e. Testemuña tenke sente seguru atu sira bele fó depoimentu ho di'ak, no liuliu la sente tauk hosi ameasa ka intimidasaun. Depoimentu husi testemuña mós bele asegura prova loloos ne'ebé ajuda tribunál halo desizaun ne'ebé justu.

Tuir JSMP nia observasaun, Lei ne'e seidak implementasaun hodi diak tanba Estadu rasik la asegura kondisaun atu implementa lei ne'e. Implementasaun ba lei testemuña presiza ekipamentu no instrument/fasilidade ketak. [Por- ezemplu, atu proteje testemuña nia identidade durante prosesu julgamentu], ne'ebé testemuña sira uza hodi bele proteje sira-nia depoimentu ho livre.

JSMP nota dala barak testemuña sira presta deklarasaun iha tribunál la seguru tanba tauk. Kuandu testemuña la sente seguru sei la bele deskobre faktus loloos tuir akontesimentu.

4. Rezolusaun inkonstitusional-intervensaun ba setor justisa;

Ita hotu dalaruma sei lembra rezolusaun rua ka tolu ne'ebé sai tutuir

malu iha Outobru 2014.⁵ Mesmu Rezolusaun ne'e akontese iha tinan tinan tolu/haat liuba, maibe sei husik hela trauma institusionál iha setor justisa. Aleinde ne'e rezolusaun hirak ne'e lori efeitu to'o mai ohin tanba lakon rekursu importante iha setor justisa. Ba JSMP ne'e nu'udar forma ida intervensaun politiku direta ba setor justisa.

Mesmu iha momentu ne'eba estadu (PN ho Governu) justifika katak ne'e tanba atu proteze no salvagurda "interese nasionál" no tanba razaun "forsa major" maibé ami la hetan prova ruma atu justifika asaun ida-ne'e.

Rezolusaun ne'e produs implikasaun sériu. Aleinde kontra prinsipiu sira iha konstituisaun, kona-ba separasaun poder, independensia judisiriu nomos infrakeza setor justisa no pratikamente rezolusaun ne'e implika kazu sira ne'ebé prosesu hela no tenke adia ba tempu naruk atu rejulgamentu fali tanba kestaun efikasias no valor ba prova ne'e rasik.

5. Konfuzsaun kona-ba interpretasaun ba kestaun imunidade

Iha pratika dalabarak iha konfuzsaun boot kona-ba interpretasaun ba kestaun imunidade no ida-ne'e afeita negativamente ba prosesu sira ne'ebé tuir lolos tenke julga⁶.

Tuir artigu 113 alinea 1 Konstitusaun RDTL, defini katak membru governu tenki hetan suspensaun bainhira nia simu akuzasaun ba krime ida ho pena másimu ne'ebé aas liu tinan 2 iha prizaun.

Iha kazu sira ne'ebé sentensa másimu ne'ebé aas liu tinan 2 iha prizaun, tuir loloos imunidade membro governu ida automatikamente suspendidu no tribunál la presiza hein ba Parlamentu Nasionál atu hasai ninia imunidade. Mesmu ida-ne'e ida ne'e diferente ho membru deputadu PN nian (PN maisumenu tinan 5 ba leten). Maibé iha pratika mosu konfuzsaun boot, até membru governu balun iha tinan sira liubá kotuk, rejeita katak sira la ba hatan tanba sira ninia imunidade.

Rekomendasaun

Bazeia ba pontu sira iha leten, ami rekomena atu:

1. Parlamentu Nasionál hodi reajenda, debate no aprova esbosu Lei Anti Korupsaun
2. Identifika nesiedade formasaun spesilizadu ba majistradu juiz no ministeriu publiku iha area kombate korupsaun

⁵ Relatoriu tematiku JSMP: Demisaun oñisiál internasionál sira no asesór sira iha setór judisiáriu Timor-Leste: Analiza ida kona-ba konstitusionalidade, legalidade no impaktu hosi Rezolusaun Parlamentariu Nú . 11/2014 no Rezolusaun Governu Nú . 29/2014 no 32/2014

⁶ Press Release JSMP: Kestaun imunidade impende julgamentu ba arguida Sekretaria Estadu Arte no Kultura, Isabel Ximenes (<http://jsmp.tl/wp-content/uploads/2015/01/imunidade-wcju1.pdf>)

3. Implementa ho efetivamente Lei Protesaun Testemuña
4. Husu PN hodi dezenvolve matadalan ida kona-ba oinsa mak atu hasai imunidade hodi klarifika konfuzaun sira ne'ebé durante ne'e eziste.
6. Tenke dezenvolve formasaun konjunta entre investigador KAK, instituisaun relevantes sira hanesan Alfandega, MP no se posivel ho juis sira.

JSMP: Servisu atu garante justisa ba ema hotu!